

671.4307
084

金集

序

凡

例

纂修姓氏

目

錄

圖

考

星

野

浮山縣志

晉城任耀先署簽



總理遺像



SWT17857/01

像 肖 公 閻 任 主 靖 綏



縣長任公榮庭肖像



續修浮山縣志序

溯稽浮乘失修屆今已五十有餘年矣此數十年之間雖山川猶昔唐風仍在而政教之演變人文之隆替與夫因革損益之事不有志焉曷以足徵故余下車之初首以問志爲務乃索邑乘寥不可得不禁感慨系之嘗語縉紳曰若不讀修久則愈益湮沒賡編更難不惟文獻之無徵而振世厲俗之風復何克以資表顯而定法戒關係豈不重歟僉云續編縣志籌經至再惟有始鮮終不無遺憾因於民國二十二年前季行政會議之際喬君俊亭復倡續修之議衆皆符允當議定欸由全縣民商酌量分担不足由縣府及募捐以補助之旋蒙核准遂於去秋開

始進行幸賴張君丹籍喬君俊亭衛君靜齋董其事在事諸君亦無不竭智襄助越數月竟告成功付諸剗劂今而後不患神山無志矣雖滄海難免遺珠之譏然沿革咸滌除封建之弊余自維謏陋愧乏三長簿書之餘勉與諸君共成此帙當此農村正值經濟艱澀之秋卒能策此國粹之舉微諸君之識見卓然毅力邁衆烏克有此爰誌數語聊示祝忱而已

署理浮山縣長兼綏靖公署軍法官晉城任耀先序於

民國二十四年四月

續修浮山縣志序

浮有修志之舉屢矣知事任公席甫氏倡於前李公子華氏和於後鋪張揚厲幾見籌備詎曇花一現竟爾寂然迨永安武公涖浮有鑒前失謂以我人我財了我事我自可主何需人爲乃求治太急規模未備倉卒設局故輻軒命駕使星出發而衆口鑠金責備方殷武又以他事去衆亦雲散嗚呼其邑乘大事非其時非其人不克肩此巨任乎何興仆之類也回遡光緒庚午迄今歲幾滿週其間典章文物因革損益奚翅百千及今徵求已嫌落後蓋歷年旣久老成凋謝文獻失佚博採旁搜均屬大難失今弗爲湮沒滋甚竊恐廬山之眞即有智者亦無由表顯

矣歲癸酉高都任公榮庭氏來宰是邦公從政既久諗民疾苦下車後首事撫綏未遑他務越明年政通人和百廢俱舉乃於政暇涉及邑乘知蕞爾之邑已往陳迹可供異日通志國史之採擇者正復不少闕而無聞與自迸四夷亦復何異歎大錯之將鑄問尸咎伊何人遂慨然以興繼爲己任是時也邑紳喬君本情亦以續修請因於上年秋七月邀集同人開館重修推余董其事余不學無術深慮隕越峻辭弗獲乃伴食附驥勉爲其難聞之古者小內史掌邦國之志太史採風問俗布之方簡故一國之風土人情政教禮化胥於是乎在而莫或廢降及周末諸侯不庭國自爲政晉之乘楚之檮杌魯之春秋已各有記秦

漢後封建廢郡縣興史官所書不過朝野大綱方隅之事不復
紀載郡縣人士知其然也乃羣起自爲以存遺迹遂成郡志縣
志之嚆矢後世因之視爲常經間數十年輒一修浮志自特菴
公四度重修後久無聲息而考其時海禁弛舶品至條約結法
權失時而開埠時而割地時而教案時而賠款固國家大事似
無關乎浮者然浮究二千縣之一影響所及痛癢係矣至霹靂
一聲推翻數千年專制一躍而爲民主共和非惟吾人聞未聞
見未見即求之歐美稽諸瑯嬛當亦少此滄桑之變而廢科舉
尙學校裁苛捐便交通革封典舉村政定法文除淫刑崇實業
禁毒品均新政卓卓者浮同覆載其能例外若夫星野建置疆

城山川古蹟祠宇祀典寺觀以及賢孝節義藝文掌故宗教風俗農商兵工或名勝依舊或制度維新或潮流異趨或碩果猶存孰得孰失何去何留綱領所在有不得不先事商確者我同人虛心考慮竭誠相與並借鏡鄰封取材異地參綜錯雜融會歸納體例始具自是後經之營之任公總其大全同人手各一編菲才如余亦執鞭役如是者九越月而脫稿此固我同人集腋之力實亦任公熱心擘畫貫徹始終有以玉成也至書中紕謬處諒復不少惟望博雅君子有以教之是則浮沚之幸矣

民國二十四年春三月邑人張桂書謹序

續修浮山縣志序

志書者紀載地方之事物也地方有志則事物有所稽考地方無志則事物無從稽考且一時有記載則一時之事物有稽考一時失記載則一時之事物無稽考從可知志書之爲要志書之續修爲尤要也況集縣志而爲通志合通志而成國史則縣志關係之重何可等閒視之乃者民國肇造已廿四載設史館修清史勢已亟亟而余縣志書自光緒六年重修後廢而未理者五十餘年典章藝文行將湮沒幅員風土久或難考設一旦史館採及浮山而浮志猶在缺無遺憾何及甲戌年余忝充文獻委員會委員長夙悉臨洪翼安等縣志書次第修竣余縣官

紳屢議及此而未竟其事竊思一誤不可再誤有始尤貴有終
因復提是議於縣行政會與議人員均表同情邑宰任公極力
提倡而士紳緒君子同心勸助張君丹籍熱心任勞歷半載而
藏其事付印之日余以名附驥尾聊述蕪辭藉叙緣起敢云序
乎哉

民國二十四年春三月邑人喬本情謹序

續修浮山志序

居千百世之下可以窺探千百世之上而能追尋古人之制度
文物者莫幸若也處千百年之前能使現世之兵農禮樂食貨
風尚垂延于千百世之後者亦莫志若也縣志豈易言乎哉不
易而言之明知其重而賤視之虛災梨棗冒然問世幾何不
騰笑今人貽譏後人語及之汗津津顏赧赧情脈脈心忐忑無
以自己也哉曰寫蹟盡形傳人以實述往代之制演今世之規
舉風俗政教而一爐冶之分緒類排都爲一帙是杞鄮雖小猶
可益麟經之策馬渤縱賤尙足爲藥籠之助居浮山言浮山更
進厚吾顏而寫無人收採之浮山風俗人物俟有集全國二十

縣之縣志而成國史者俯拾及之有如阮籍畫鬼橫塗豎抹惟其自知有指而目之者亦未必窮其究竟也逸僧曰斯則然矣使續志出有言其醜者未必醜也吾恐無人言焉是真醜而尤矣至舊志則吾不敢續亦非吾之所能續爰述其梗概如右

民國二十四年春三月邑人張範古謹序

原序

古謂史有三長曰學曰識曰才志乘之輯猶是也浮雖最爾山城在唐虞爲近畿地沐浴聖化遺澤孔長其間可紀之事與可傳之人較諸通都大邑無多讓焉歲庚辰余承乏茲土先奉有纂修縣志之檄前署令鹿公笠儕籌畫布置井井有條雖未及從事而大局已具余踵而行之亦未有以更張也願維邑乘之修關乎政治幅員有廣狹土地有肥饒物產有盈絀民風士習有盛衰皆將於是乎稽之他若鄉賢名宦忠孝節義之屬尤足以感激人心維持世教所係更有重焉者余自維固陋愧乏三長洵無以摘藻揚芬闡揚盛美然猶願與襄事諸君相約爲戒

毋陟阿徇毋存刻覈毋參以臆見毋掉以輕心用是矢慎矢公
不遺不濫則庶幾邑之有志無異乎國之有史允足以信今而
傳後也歟是爲序

光緒六年歲次庚辰仲冬之月知浮山縣事甯蜀裴允莊識

原序

光緒丁丑晉省旱魃爲殃而平郡尤甚戊寅又旱積困彌深凋敝之形不堪言狀蓋數百年未有之奇災也幸蒙聖天子渥澤頻敷蠲租給賑諸憲台悉心救濟仍復靡欸不籌而饑民之枵腹待斃者始得漸免於溝壑之填洵所謂起死而肉骨者矣歲己卯賑務始暇而地方災祲之餘彌殷宸慮遂有纂修省志之命由是檄下各屬俾輯志乘以備採擇是年冬暮余適司鐸浮山權縣事范陽鹿公謬加青睞命襄編纂校讐之役余自維謏陋愧不敢當未幾公去官而相繼視事者則寧蜀裴公也乃亦曲從前議辭不獲允然終恐以捫燭扣槃之見貽笑大方爰與